



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



Informacija o rezultatima ankete o inflacijskim očekivanjima iz juna 2025. godine



U savremenim uslovima, kada su tržišta podložna brzim promjenama, stabilizacija inflatornih očekivanja ima ključnu ulogu u očuvanju cjenovne stabilnosti. Pri tome je bitno napomenuti da očekivana inflacija ne predstavlja stvarnu inflaciju, već predviđanje koje se temelji na trenutnim ekonomskim uslovima, monetarnoj politici, cijenama energenata, uvoznim troškovima i geopolitičkoj situaciji. Upravo iz tih razloga, Centralna banka Bosne i Hercegovine (CBBiH) kvartalno provodi Anketu o inflatornim očekivanjima, u skladu s rastućim interesom domaćih i stranih institucija. Učesnici ankete su predstavnici finansijskog sektora – komercijalne banke i osiguravajuća društva – a njeni rezultati omogućavaju kvalitetniji uvid u ponašanje ekonomskih subjekata i njihova očekivanja o budućem kretanju inflacije.

Prema rezultatima ankete provedene u junu 2025. godine, očekivana inflacija za tekuću godinu iznosi 3,4%, što je značajan pad u odnosu na 4,2% iz marta ove godine. Pad ovih očekivanja ukazuje na to da finansijske institucije nisu bile iznenađene intenzitetom inflatornih pritisaka, s obzirom na to da su prethodne prognoze za 2025. godinu bile oko 3,6% i više. Očekivanja za 2026. godinu također su revidirana naniže – sa 3,3% u martu na 3,2% u junu, što potvrđuje relativno prilagođavanje jakim negativnim rizicima i potrebi za kontinuiranim praćenjem agregatne potražnje, naročito potrošnje.

U novijem periodu, vidljiv je određeni pomak ka stabilizaciji inflatornih očekivanja. Važno je naglasiti da se očekivanja o inflaciji ne bi trebala formirati s nerealnim optimizmom. Umjesto toga, ona moraju biti bazirana na realnim ekonomskim pokazateljima, uključujući činjenicu da je u Bosni i Hercegovini prisutna i uvozna inflacija. Očekivana inflacija ostaje važan pokazatelj ekonomskog segmenta i ključan faktor u odlučivanju centralnih banaka, preduzeća i potrošača. Njeno kontinuirano praćenje i realističko sagledavanje, uz pravovremene i odlučne mjere ekonomske politike, ostaje neophodno kako bi se ublažili negativni efekti i očuvala makroekonomska stabilnost.

